

Tungkol saan ang modyul na ito?

Hindi natin maiiwasan ang kalamidad. Darating at darating iyon dala ng pagbabago ng panahon. Subalit ang peligrong dala nito ay ating maiiwasan. Ang gawi ng tao ang nagdadala ng kapahamakan sa kapaligiran. Dahil ito sa pangangailangan ng tao. Nagkakaingin sila para may pagtamnan, nagtotroso at nagmimina para kumita. Hindi alam ng tao na ang labis na paggagahasa nila sa kalikasan ay nagdadala ng kapinsalaan sa kanilang buhay.

Ang modyul na ito ay sadyang inihanda para magkaroon ang bawat isa ng kaalaman tungkol sa mga sanhi at epektong dulot ng kalamidad na gawa ng tao.

Nahahati sa dalawang aralin ang modyul na ito.

Aralin 1 – Dila ng Apoy

Aralin 2 – Kapayapaan, Nasaan?

Ano-ano ang matututuhan sa modyul na ito?

Pagkatapos mong pag-aralan ang modyul na ito, magagawa mo ang sumusunod:

- nabibigyan ng pagpapahalaga ang buhay at ari-arian bago mangyari ang kalamidad na gawa ng tao;
- natutukoy ang mga sanhi at epekto ng maling paggamit ng apoy;
- natutukoy ang mga sanhi at epekto na naidudulot ng kaguluhan.

Ano-ano ang alam mo?

Bago mo simulan ang pag-aaral ng modyul na ito, sagutin ang sumusunod na tanong upang mabatid mo kung ano na ang nalalaman mo tungkol sa paksang ito.

Isulat ang tsek (✓) sa sagutang papel kung ang pangungusap ay tama at ekis (✗) kung mali.

- _____ 1. Gamitin ang gas stove sa pagsisindi ng gasera.
- _____ 2. Ang pagsisiga sa tabi ng bahay ay tama lamang para mawala ang mga lamok.
- _____ 3. Dapat lamang magsunog ng kagubatan upang luminis ang kapaligiran.
- _____ 4. Walang pagkakakitaan ang tao kung hindi kakahuyin o puputulin ang mga puno sa kagubatan.
- _____ 5. Nakaaakit sa turista ang magagandang tanawin ng bansa.

Ihambing ang inyong sagot sa pahina 26 ng modyul.